

Introduída

Custos materiales los appo ammaniados a ziru de custos annos comente base de tribagliu in sas lessiones c'appo fattu in sos cursos de azornamentu pro maestros e pro professores in provintzia de Tathari e de Nuoro, e in sos cursos de limba sarda, s'annu coladu e antiannu, in s' Universidade de Tathari.

Sa peraula "materiales", cheret sinnificare chi non est unu tribagliu serradu, congrúidu, comente diat poder esser unu trattadu, o unu liberu finidu, ma unu tribagliu, diamus poder narrer, galu in caminu, unu tribagliu chi s'est fattende in su faghersí, a cuntattu chin s'ispe-riensia didattica, isentifica e politica. Politica in su sinnifícu de cussensia tzivile de sardu chi sa limba sua non si che l'at fatta segare mai e chi diat cherrer dare un'azu-
du, finas minore, a chi sos sardos de oe e de cras, me-
sche sos prus zovanos, crescant in custa cussensia.

S'idea chi aunit custos materiales est chi su mundu in su cale bivimus est attraessadu da-e sinnos, e da-e sos sinnificos chi custos sinnos zughent a pala, ch'impreamus pro faeddare, iscrier, lezer, pro cumprender sos ateros, e sos ateros a nois.

Sa limba, intro cust'idea, ateru non est che unu siste-
ma de sinnos chi nois impreamus pro lantziare e pro re-
tzire imbassos garrigos de sinnificos. Diamus poder nar-
rer chi sa limba est unu mediu, e, tramide sou, faghi-
mus a manèra de intaulare chin sos ateros relassiones
comunicativas, in finis, relassiones umanas.

S'obiettivu mazore, tando, de s'istudiu, de s'impàru,
de sa chirca isentifica, a ziru de una limba, est chi si
nd'isviluppet sa funsione comunicativa, ca si non custa

limba morit, e cale si siat ammanizu subra sua est comente s'ammanizu de un' anatomista subra unu corpus mortu.

Chie aberit custu liberu si c'agat luego intro sa limba logudoresa faeddada, attraessu sos chistionos e sas pagas peraulas chi in pagu tempus diant poder dare, finas a chie de custa limba est zeunu de su tottu, sos trastos pro si poder presentare, pro poder fagher a sos ateros carchi dimanda e cosas gai. Chin s'azudu de unu mastro o de unu professore sardofunu si podent imparare sas primas cumpetensias de sinnificu e sos cuntrestos de impréu de sas peraulas. Diat esser a narrer cumpetensias semanticas e pragmaticas. Sos testos c'amus introduidu non sunt meda. Antzis sunt pagos, si pessamus a sos diferentes livellos de pratica testuale chi una cumpetensia limbística-comunicativa recherit. Ma s' obiettivu non est custu, nessi pro como. De custu métodu amus a dare contu in un'ateru tribagliu a banda. Inoghe amus cherfidu dare solu carchi indícu, e prus de tottu amus chérfidu distimonzare su ca'mus fattu chin chie nos at sighidu in custos annos, comente amus tribagliaidu cuncretamente, e comente si diat poder tribagliare. Est unu modu semprize, abertu, chi onzunu diat poder adderettare a su essu sou, a segundu s'isperiensia de cadeunu. Pro codomidade amus postu finas sas partes mazores de sa morfologia e de sa sintassi, a manèra nessi, de assuprire a sos testos chin sos cales amus tribagliaidu.